

Presentadu in Orosei su bandu pro su benistare animale

Confagricoltura Sardinna at programmadu unos cantos addòvios in totu sa Sardinna pro faeddare de sa misura noa (Misura 215) de su benistare animale.

S'8 de triulas, in dae in antis a una truma manna de pastores, Confagricoltura at fatu s'addoviu in Orosei in sa sede zonale sua.

A prus de una presentada a finu de su bandu Confagricoltura at bogadu a pizu sas cosas chi no andant bene e sas propostas de commente mudare su bandu, chi at zai finas presentadu a s'Assessore a s'Agricoltura.

Sos pastores chin atentu e cuidadu mannu ant apozadu sas críticas de Confagricoltura a su bandu.

Su dibatidu at pertocadu mascamente custas chistiones:

Pastores chi poden pigare su contributu

Su bandu narat chi podent pigare su contributu sos pastores chi ant nessi 5 UBA (33 berveghes). Custu tantu de 5 UBA a pàrrere de Confagricoltura Sardinna est tropu bassu. S'iscopu de sa norma devet èssere difatis cussu de azuare s'impresa agricola. Confagricoltura Sardinna proponet chi su tantu mìnimu pro pòdere pigare su contributu siat nessi de 10 UBA (66 berveghes).

S'isterrimenta in su cuile

Su bandu narat de azùnghere paza o àteru materiale addatu nessi una borta a sa chida, pro mantènnere s'isterrimenta assuta, modde e neta. Su tantu de paza o àteru materiale addatu postu pro istèrrere devet èssere marcadu in unu documentu apòsitu.

Su de marcarenza cada chida s'azunta de paza est una runza in prus pro su pastore e non serbit a nudda. Confagricoltura Sardinna proponet chi non si devat marcarenza s'azunta de paza.

Ite fàghere pro averguare sas murdiduras

Su bandu narat de averguare cada mese sas berveghes de madrigadu cun s'esàmene CMT (California Mastitis Test).

Su controllu mensile est un'àtera pelea pro su pastore.

Confagricoltura Sardinna proponet de mudare su bandu ponende unu controllu cada tres meses.

Su bandu narat, finas, de isèrghere su late de sas berveghes curadas pro sa murdidura.

Confagricoltura Sardinna pedit de iscrivere cun craresa ite cheret nàrrere a istesiare su late. Unu contu difatis est a considerare su late commente refudu ispetziale, àteru est a nche lu istesiare ebbia.

Ite fàghere pro prevènnere su topìghine

Su bandu pro prevènnere su topìghine, narat chi sas berveghes non devent pàschere in terrinos inue b'at abba apadulada.

Confagricoltura Sardinna pedit de iscrière cun craresa ite cheret nàrrere “terrinos inue b'at abba apadulada”.

Non si comprendet difatis ite diant dèvere fàghere sos pastores chi ant su cuile inue bi colat unu riu, o ue diant dèvere pàschere sas berveghes, pro nàrrere, a pustis de duas dies de abba, cando su bonu de sos terrinos sardas sunt che una ludrina.

Presentada de sa dimanda in carta

Su bandu narat de presentare finas sa dimanda in paperi.

Confagricoltura Sardinna proponet de nche dogare sa dimanda in paperi e de fàghere, a pustis de unu acordu intre sos Sindacados de categoria agrìculos e sa Rezione, commente capitat pro su prèmiu Ùnicu, inue imbiant sa dimanda petzi telematicamente e sos CAA (Tzentros de Assistèntzia Agrìcola) si pigant sa responsabilidade de collire una copia de sa dimanda firmada in s'incartamentu chi zai ant collidu in sa sede issoro.

Su matessi discursu si podet fàghere pro su documentu de identidade chi resurtat protocolladu in su SIAN (Sistema Informativu Agrìculu Natzionale) e collidu dae sos CAA.

Pèrdida de su contributu

Si unu pastore rinùntziat a su contributu no est craru su chi devet torrare.

Diat dèvere torrare difatis, petzi su tantu de s'annu interessadu e non totu su chi su pastore at retzidu pro sos annos chi at mantesu sos impinnos.

Cunsiderende su chi b'at capitadu in su bandu betzu, Confagricoltura Sardinna proponet de crarire in su bandu nou ite li capitat a su pastore chi si nche ismentigat de presentare sa dimanda pro un'annu finas si cuss'annu mantenet sos impinnos.

A pàrrere de Confagricoltura Sardinna si unu pastore pro un'annu non presentat sa dimanda, e pro cuss'annu mantenet sos impinnos, devet pèrdere su cuntributu pro cuss'annu ebbia e non pro totu sos chimbe annos.